

XVI. KARARAG ITI PANAGBANTAY ITI MINATAY

RITO A PANGRUGI

Kanta a Panglukat

Pangkablaaw

Mangidaulo: Iti nagan ti Ama....

Gimong: Amen

M: Kakabsat, mamatitayo a saan a rakraken ni patay ti singgalut ti panaggagayyem ken panagpipinnategtayo. Iti panagtalektayo a kanayon a silalagip ti Dios kadagiti naimbag nga inar-aramidtayo ken pakawanenna dagiti basbasoltayo, agkararagtayo nga agdawat ti panangaklonna kenni **N.** a kabsattayo.

Kararag A Panglukat:

Option A:

M: Dios nga Apomi, ipalagip ti ipapatay ni **N.** a kabsatmi ti kasasaadmi a tattao ken ti kaababa ti panagbiagmi ditoy daga. Ngem kadagiti mamati Kenka, ti patay ket saan a pagpatinggan, saan nga isu ti mangrakrak ti singgalut ti panaggagayyem a pinandaymo iti panagbiagmi. Makiranudkami iti pammati dagiti adalan ti Anakmo ken ti namnama dagiti annak ti Dios. Itdem kad ti silaw ti panagungar ni Cristo iti daytoy a kanito ti pannakasubok ken saem a parnuayen ni ladingit bayat ti panangikarkararagmi kenni **N.** kasta metten kadagiti mangipatpateg kenkuana, gapu ken Cristo nga Apomi.

G: Amen.

Option B:

M: O Dios, Gloria dagiti mamati ken biag, dagiti nalinteg, gapu ti ipapatay ken panagungar ti Anakmo, naisalakankami. Kaasiam kad ni **N.** nga adipenmo, ket pagbalinem a maikari a makiranud kadagiti ragraagsak iti paraiso ta namati ket ngarud iti panagungar dagiti natay. Dawatenmi daytoy gapu ken Cristo nga Apomi.

G: Amen.

pagnaedantayo —ti bagitayo ditoy daga—addanto balay nga ited ti Dios kadatayo idia langit, balay a saan nga aramid ti tao no di ket agnanayon sadi langit. Isu't gapuna a kanayon a natalgedkami. Ammomi nga idinto nga agtaengkami iti daytoy a bagi, adayokami iti Apo. Ta agbiagkami iti pammati, saan nga iti banag a makita. Natalgedkami unay ket kaykayatmi nga adayo ti pumanaw iti balaymi tapno makipagnaedkami iti Apo. Nupay kasta, ikagumaanmi ti pannakaay-ayona. Ta masapul a dumatagtayo amin iti sangoanan ni Cristo. Ukomennatayo, ket awaten ti tunggal maysa ti maikanatad kenkuana, segun ti inaramidna, naimbag man wenno dakes, bayat ti panagbiagna.

Ti Sao ti Apo.

G: Agyamantay ti Dios.

Salmo Responsorio

Sungbat: **Mawaw toy Kararuak Kenka, O Apo ket Diosko.**

1. O Apo, sika ti Diosko, ket birbirokenka.
Toy kararuak mawaw Kenka
Toy lasagko isaksakitna ti iliwna Kenka,
Kas namaga ken mawaw a daga nga awan dam-egna.
Isu ngarud nga iti uneg ti santuariom binuybuyaka.
(**Sungbat**)
2. Tapno kitaek dayta bilegmo ken dayaw,
ta dayta ayatmo nasaysayaat ngem ti biag,
dagitoy bibigko indakanto ibunannag.
(**Sungbat**)
3. Anansata idaydayawkanto no addaanak pay la ket ti biag.
Kas pangitan-okko ita naganmo itag-ayko dagitoy imak.
Kas naggapuak iti padaya, mabsogto toy kararuak.
Daydayawennakanto ti ngiwatko a siraragsak. (**Sungbat**)

Kanta A Maiballaet

Ebanghelio:

M: Ti maibasa manipud iti ebanghelio ni San Lucas.
(Lucas 12:35-40)

Kinuna ni Jesus kadagiti disipulosna: “Masapul a sisasaganakayo latta iti uray ania a mapasamak ken sigagangat dagiti pagsilawanyo a kas kadagiti adipen a mangpaspasungad iti amongda a napan nakiboda. No sumangpet ket agtugtog, dagdagusenda nga ilukat ti ridaw. Anian a ragsak dagiti kakasta nga adipen a siririing ken sisasagana a masangpetan ti amongda. Ibagak kadakayo, agkawesto iti pagserbi, pagtugawennanto ida iti panganan, ket serbiannanto ida. Anian a ragsakda no masangpetanna ida a sisasagana, uray no sumangpet iti tengnga ti rabii wenno naladladaw pay.

Ammoenyo daytoy: No ammo ti ama ti familia ti oras ti iyaay ti mannanakaw, dinanto itulok a serken ti mannanakaw ti balayna. Kasta met kadakayo, masapul a sisasaganakayo latta, ta umayto ti Anak ti Tao iti oras a diyo ipagpagarup.”

Ti ebanghelio ti Apo

G: Dayaw ti maipaay Kenka, O Cristo

KARARAG A MANGIBABAET:

Litania

M: Kakabsat, agkamangtayo a sitatalek ken sipapati ken Apotayo a Jesucristo iti bileg ti krus ken panagungar. Nagungar nga Apo, agnanayon a pagwadan ti panagbiagmi, kunami: Apo, Mangngaasika.

M: Apo, sika ti kari ken ladawan ti masakbayanmi: Apo, mangngaasika.

G: Apo, mangngaasika.

panagbuteng iti patay: Apo, mangngaasika.

G: Apo, mangngaasika.

M: Apo, sika a nailansa ti krus, nabaybay-an iti patay, nagungar iti Gloria: Apo, Mangngaasika.

G: Apo, mangngaasika.

M: Apo, sika ti nanakman a Pastor a mangted inana kadagiti kararuami, ikkam ti agnanayon a panaginana ni N.: Apo, Mangngaasika.

G: Apo, Mangngaasika.

M: Apo, bendisionam dagiti agladingit ken agsagsagaba iti saem. Bendisionam kad ti pamilia ken gagayyem ni N. nga adda iti sibayna ita nga aldaw: Apo, mangngaasika.

G: Apo, mangngaasika.

Kararag ti Apo

M: Kakabsat, adda idia langit ti napaypayso a pagtaengantayo. Agkararagtayo ngarud iti Amatayo kas insuro ni Apo Jesus kadatayo:

G: Amami....

RITO A PANGGIBUS

Maudi A Kararag

P: Kumararagtayo:

Option A:

M: Apo Jesus a salakanmi, situtudioka a natay tapno maisalakankami ket aglasatkami iti patay nga agturong iti biag. Sipapakumbabakami nga agdawat Kenka ta liwliwaem kadi dagitoy nga adipenmo iti panagladingitda, ket awatemon ni N. iti arpad ta

nga awan ti inggana.

G: Amen.

Option B:

M: Dios nga Apo, indengam dagiti ararawmi. Masarakanmi kadi iti Anakmo ti liwliwa dagiti ladingitmi, naan-anay a rikna kadagiti panagduduami, ken ti tured nga agbiag kadagitoy a kanito. Papigsaem ti pammatimi gapu ken Cristo nga Apomi.

G: Amen.

Bendision:

M: Nagasat dagiti natay iti Apo, palubosanyo ida nga aginana kadagiti trabahoda ta sumursurot kadakuada dagiti naimbag nga aramidida.

M: Apo, itdem kad kenkuan ti agnanayon a panaginana.

G: Ket pagraniagem kad kenkuana ti lawag nga awan patinggana.

M: Aginana koma ti kappia.

G: Sapay koma ta kasta.

M: Sapay koma ta ti kararua ni N. ken ti kararua dagiti amin a pimmusayen, babaen met aleng ti ayat ken kaasi ti Dios, aginanada koman iti kappia.

G: Amen.

M: Agtalinaed koma kadagiti puso ken panunottayo ti di matukod a kappia ti Dios babaen ti pannakaammo ken panagayat ti Ama ken ti Anakna, ni Apotayo a Jesucristo. Ket bendisionantayo koma ti pannakabalin-amin a Dios: Ti Ama, ken ti Anak ken ti Espiritu Santo.

G: Amen

KANTA A PANGGIBUS